

群

經

平

議

羣經平議卷四

德清俞樾

尙書二

我后不恤我眾舍我穡事而割正夏

湯誓

傳曰我后桀也正政也言奪民農功而爲割剝之政
樾謹按史記殷本紀曰舍我耒耨事而割政無夏字枚
傳亦不及夏字是夏字衍文也後人因正義曰爲割
剝之政于夏邑故妄增之耳然傳義與經旨未合蓋
經旨正如蔡傳所謂亳邑之民憚伐桀之勞者宋儒
雖短于詁訓至其體會古人語意則有獨得之見未

可盡沒也我后當謂湯割讀作害大誥天降割于我家釋文曰割馬本作害是割與害古通也害卽下文時日害喪之害今作曷乃後人所改孟子梁惠王篇引作時日害喪可證古本作害也詩葛覃篇毛傳曰害何也亳眾蓋曰我后不恤我眾舍我穡事而何正乎故湯告之曰予畏上帝不敢不正也史記作政者正之爲政猶害之爲割竝段借字耳

有眾率怠弗協

傳曰眾下相率爲怠惰不與上和合

樾謹案史記集解引馬注曰眾民相率怠惰不和同

枚傳正用馬注然非經旨也經方言桀之無道乃又責民之怠惰斯不然矣怠讀爲殆古怠與殆通詩元鳥篇受命不殆鄭箋曰受天命而行之不解殆論語爲政篇思而不學則殆何晏注曰徒使人精神疲殆解殆與疲殆其字並當作怠而經皆作殆是怠殆通也此文怠字當爲危殆之殆言夏王率遏衆力率割夏邑故其民率危殆而弗協也三率字皆語詞詩思文篇帝命率育毛傳曰率用也馬注以相率釋之亦誤矣

盤庚遷于殷民不適有居

盤庚上

樞謹案遷于殷是旣遷矣民不適有居是旣遷之後
民有所不便非未遷以前民不樂遷也嘗取盤庚三
篇反覆推求竊謂盤庚之作當從史記殷本紀說紀
云帝盤庚甥弟小辛立是爲帝小辛帝小辛立殷復
衰百姓思盤庚乃作盤庚三篇是盤庚之作在小辛
時作盤庚所以諷小辛也傷今思古猶小雅楚茨諸
篇之義也呂氏春秋慎大覽曰武王乃恐懼太息流
涕命周公旦進殷之遺老而問殷之亡故又問衆之
所說民之所欲殷之遺老對曰欲復盤庚之政武王
於是復盤庚之政然則史記謂百姓思盤庚信有徵

矣盤庚之作因百姓思盤庚而作則所重者盤庚之政也其首篇述盤庚遷殷之後以常舊服正法度卽所謂盤庚之政也此作書之本指也其中下兩篇則取盤庚未遷與始遷之時告誡其民之語附益之故雖三篇而伏生止作一篇也後漢書文苑傳杜篤論都賦曰盤庚去奢行儉于亳李賢注引帝王世紀曰盤庚以耿在河北迫近山川自祖辛以來奢淫不絕盤庚乃南渡徙都于亳正義引鄭注意亦略同是盤庚之政去奢行儉之政也篇首曰盤庚遷于殷民不適有居蓋民習于耿之奢淫故至殷而不適有居言

不安于所居也盤庚以常舊服正法度而告之曰無
傲從康又曰不昏作勞不服田畝越其罔有黍稷又
曰各長于厥居勉出乃力聽予一人之作猷又曰自
今至于後日各恭爾事齊乃位度乃口罰及爾身弗
可悔所再三致告者皆勉以本業戒以荒淫正與去
奢行儉之指合且曰自今至于後日則爲既遷後所
作可知使其時尙未遷則但可如中篇之末所云今
予將試以汝遷不當曰自今至于後日也又自王
曰格汝眾至罰及爾身弗可悔凡數百言無一語及
遷至中篇則屢言之曰視民利用遷又曰今予將試

以女遷安定厥邦又曰今予將試以汝遷永建乃家
豈非中篇述未遷時語故屢及之上篇乃盤庚遷殷
後正法度之言與遷無涉乎故以當時事實而言盤
庚中宜爲上篇盤庚下宜爲中篇盤庚上宜爲下篇
曰盤庚作惟涉河以民遷者未遷時也曰盤庚既遷
莫厥攸居者始遷時也曰盤庚遷于殷民不適有居
者則又在後矣惟莫厥攸居而民不適有居此盤庚
所以必正法度也然則作書者何以顛到其序乎曰
作書之序如此也盤庚之作百姓追思之而作也思
盤庚思其政也故始所作者蓋止今之上篇載盤庚

遷殷正法度之言而已無中篇無下篇也然而盤庚未遷與始遷時再三致告其民者民猶孰而能詳也於是亦附其後焉此中下兩篇所以作也序書者不能不曰三篇在作書者則以上篇爲主而中下兩篇特附焉者也是故盤庚三篇宜乃伏生之舊合爲一篇而仿漢石經之例罰及乃身弗可悔之下空一格接盤庚作永建乃家之下空一格接盤庚旣遷以見古人附錄之體而其義則從史記爲百姓追思而作上篇所載皆盤庚遷殷後之言則篇中文義自明矣

率籲眾感出矢言曰

樾謹按盤庚上篇旣曰盤庚遷于殷又曰盤庚敷于民由乃在位一篇而兩用發端之語先儒未有得其義者今按說文頁部顓呼也商書曰率顓衆戚是感本作戚今作感者後人依枚傳義改之也率乃語詞詩思文篇毛傳曰率用也盤庚因遷殷之後民不適有居用是呼衆戚近之臣使之出而矢言于民也顓之義當從說文訓呼古彝器銘詞每用呼字無專鼎曰王呼史友冊命無專頌鼎曰王呼史虢生冊命頌師遽敦曰王呼師朕錫師遽貝十朋師酉敦曰王呼史穉門冊命師酉吳彝曰王呼史戊冊命此類甚

多然則籲眾戚者呼眾戚也正古人紀載之體自我
王來旣爰宅于茲至底綏四方凡九十四字皆盤庚
使人依己意爲此言故盤庚之文聲牙難讀而此九
十四字獨爲明順蓋誤述之文與面命者不同也其
文至底綏四方已畢下乃盤庚進其臣而親話之與
上文不相蒙故各以盤庚發端焉

我王來旣爰宅于茲

樾謹按我王卽謂盤庚也盤庚自言皆稱予此則使
眾近臣出而陳辭非盤庚自言故稱我王也來者自
耿來亳也爰之言易也僖十五年左傳晉於是乎作

爰田服注曰爰易也既爰宅于茲言既易宅于茲也
盤庚上篇爲遷殷後作此其明證矣

不能胥匡以生卜稽曰其如台

樾謹按商書言其如台者四湯誓篇夏罪其如台高
宗彤日篇乃曰其如台西伯戡黎篇今王其如台殷
本紀皆易其文曰柰何惟此篇卜稽曰其如台本紀
不載以類求之則亦當爲柰何蓋古語如此也曰字
句中語助非卜詞也言我民不適有居則是奢淫無
度不能相正以生矣雖卜稽可柰何當以卜稽曰其
如台六字爲句曰其猶越其也下文曰越其罔有黍

稷越與曰古通用耳傳曰卜以決疑不疑何卜盤庚之遷蓋不用卜故有非敢違卜之言說詳下篇當時臣民必有以此爲口實者故盤庚言苟不能以法度相正以生雖卜亦無如何耳

先王有服

傳曰先王有所服行

樾謹按枚義迂曲殆非也說文又部良治也從又從冂冂事之制也然則服事之服字本作良今經傳皆作服服行而良廢矣冂爲事之制故服亦爲制鄭石制字子服是也襄三十年左傳子產使都鄙有章上

下有服上下有服言上下有制也杜注曰公卿大夫服不相踰則誤以爲車服之服矣呂氏春秋樂成篇曰田有封洫都鄙有服高注曰服法服也然都鄙有法服義不可通疑高氏原注曰服法也蓋服爲制故亦爲法淺人不知其義妄加服字耳此云先王有服言先王有制也盤庚遷殷之後因民習以耿之奢淫不適有居故以先王之制告之其下云以常舊服正法度所謂常舊服卽先王之制矣

于今五邦

傳曰湯遷亳仲丁遷囂河亶甲居相祖乙居耿我往

居亳凡五徙國都 正義曰孔以盤庚意在必遷故
通數往居亳爲五邦鄭王皆云湯自商徙亳數商亳
器相耿爲五計湯旣遷亳始建王業此言先王遷都
不得遠數居亳之前充此數也

樾謹按釋文引馬融云五邦謂商上亳器相耿也其
說亦與鄭同請以漢人舊說破之張平子西京賦曰
殷人屢遷前八而後五據書序自契至于成湯凡八
遷湯始居亳從先王居然則後五遷當從亳始若并
商上數之則不足前八遷之數矣枚傳悉本書序自
不可易但因不知上篇爲遷殷後作而曰我往居亳

則疑不可并今所欲遷者而預數之正義謂意在必
遷故通數爲五此說殊爲迂曲故自盤庚上篇之義
明而五邦之數亦定矣

盤庚敦于民由乃在位

傳曰敦教也教人使用汝在位之命

樾謹案傳義非也說文教部敦覺悟也益民之不適
有居由于奢淫成俗而民之奢淫成俗實由在位者
導之盤庚覺悟于民之不適有居由于在位者之故
而欲以法度正之故曰盤庚敦于民由乃在位九字
作一句讀其下曰以常舊服正法度曰無或敢伏小

人之攸箴文義本一氣正義曲徇枚傳曰先教民又戒臣失之矣

予告女訓女猷黜乃心

傳曰告女以法教謀退女違上之心

樾謹按此當以予告女訓女五字爲句告女訓女與中篇承女俾女文法正同猷黜乃心四字爲句傳云中篇承女違上之心卽釋猷黜乃心之義謀退上無女字知經文猷黜上不當連女字也今讀予告女訓爲句不如枚傳爲長惟傳以猷爲謀義亦未安說文無猷字文選張茂先女史箴王猷有倫注引詩王猶允

審云猷與猶古字通是猷卽猶字也猶通作山莊十
四年左傳正義曰古者猶山二字義得通用是也山
川也猷亦川也言予告女訓女川黜女違上之心也
中篇曰暨予一人猷同心猷同心者川同心也傳曰
謀同心徒葢不知其爲諧詞而訓爲實義習失之矣
王播告之修不匿厥指

傳曰王布告人以所修之政不匿其指

樾謹按說文言部譌敷也商書曰王譌告之近世學
者皆據此謂當於之字絕句然修字屬下讀殊不成
義恐說文或奪去修字未足據也惟如傳義解爲王

布告人以所修之政亦於經文不合經言播告之修
不言播告以所修也修疑當讀爲迪修字本從攸聲
多方篇不克終口勸于帝之迪釋文云迪馬本作攸
然則以修爲迪猶以攸爲迪也呂刑篇惟時伯夷播
刑之迪與此經播告之迪文義正同迪者道也枚氏
於彼傳解爲伯夷布刑之道然則播告之迪亦謂布
告之道也盤庚進其臣而告之期於開誠布公使羣
臣同諭故首言先王布告之道如此見我今日亦率
由是道也因畝修爲迪故學者不得其解耳

惟女含德不惕予一人

傳曰女不從我命所含惡德但不畏懼我耳

樾謹按經文止言含德不言含惡德傳乃增出惡字
非經旨矣含之言藏也懷也國語楚語土氣含收韋
注曰含藏也戰國策秦策含怒日久高注曰含懷也
惟女含德者惟女懷藏其德也惕當讀爲施白虎通
號篇引尚書曰不施予一人卽盤庚此文段氏撰異
謂古文作惕今文作施其實古文惕字當從今文讀
作施字施本字惕段字言女懷藏其德不施及予一
人也含與施正相應成義下文曰女克黜乃心施實
德于民施德于民卽施予一人君民一體也上用段

字下用本字古書自有此例解爲畏懼非其旨矣
女不和吉言于百姓

傳曰責公卿不能和喻百官

越謹按枚傳未得和字之義和當讀爲宣禹貢篇和
夷底績水經恒水注引鄭注曰和讀曰桓桓與宣並
從亘聲古亦通川魏策魏桓子韓子說林篇作魏宣
子是其證也和可讀爲桓故亦可讀爲宣矣女不和
吉言于百姓者女不宣布吉言于百姓也枚以本字
讀之非是

世選爾勞

傳曰選數也言我世世數女功勤

樵謹按傳訓選爲數於義迂曲非經旨也選當讀爲纂爾雅釋詁纂繼也禮記祭統篇纂乃祖服褻十四年左傳纂乃祖考國語周語纂修其緒其義並同世纂爾勞者世繼爾勞也故下文曰予不掩爾善也選從與聲纂從算聲古音相近說文食部纂具食也從食算聲重文饌曰纂或從與是與聲算聲相近之證詩柏舟篇不可選也後漢書朱穆絕交論引作不可算也選之通作纂猶選之通作算矣

盤庚作惟涉河以民遷

盤庚中

傳曰爲此南渡河之法用民徙 正義曰鄭元云作
渡河之具王肅云爲此思南渡河之事此傳言南渡
河之法皆謂造舟船渡河之具是濟水先後之次思
其事而爲之法也

樾謹按經文止言盤庚作不言造作舟船諸說皆非
經旨由不知盤庚中篇實爲上篇故也孟子公孫丑
篇曰由湯至於武丁賢聖之君六七作與此作字同
盤庚作猶繫辭傳曰神農氏作黃帝堯舜氏作也盤
庚作惟涉河以民遷言盤庚既卽位承祖乙之後奢
侈逾禮故思涉河以民遷也中下兩篇皆附錄盤庚

遷都之事改以此發端中篇曰盤庚作惟涉河以民
遷下篇曰盤庚既遷正相因也上篇曰盤庚遷于殷
則爲遷殷後事自後人泥下篇第四并盤庚作之義
而失之矣下云乃誥民之弗率蓋上篇是遷殷後事
故曰不適言既遷而民不便也中篇是未遷時事故
曰弗率言將遷而民弗從也

乃誥民之弗率

傳曰話善言

懃謹按詩板篇抑篇毛傳並曰話善言也話之爲善
言固古訓矣然此經話字在民之弗率上則非善言

之謂也善言民之弗率於義豈可通乎話當讀爲估
說文人部估會也字亦作括詩車牽篇德音來括傳
曰括會也蓋皆聲近而義通盤庚會令民之弗率者
而話之故曰乃話民之弗率話卽估之段字不當以
木義說之

古我前後罔不惟民之承保后肖感鮮以不浮于天時
傳曰言我先世賢君無不承安民而恤之民亦安君
之政相與憂行君令浮行也少以不行於天時者言
皆行天時

然按枚讀保后肖感爲句非也洛誥篇承保乃文

祖受命民亦以承保連文江氏聲讀罔不惟民之承
保爲句洵長於舊讀矣后胥感當自爲句胥感者相
憂也言憂民之憂也鮮讀爲斯詩瓠葉篇鄭等云今
俗語斯白之字作鮮齊魯之間聲近斯是鮮與斯聲
近義通浮讀爲佛後漢書襄楷傳注曰浮屠卽佛陀
但聲轉耳鮮以不浮于天時者斯以不佛于天時也
說文口部呬違也古書每以佛爲之法言寡兒篇佛
乎正李軌注曰佛違也文選非有先生論夫談者有
悖於目而佛於耳李善注引字書曰佛違也並其證
也又曰佛扶勿切是佛與扶爲雙聲而浮從孚聲與

扶爲疊韵故浮得讀爲佛也此言君常憂民之憂斯
于天時無所違失若從攸傳則但曰鮮不浮天時文
義已足而以字于字皆贅矣江氏聲據漢后經戚作
高因讀后胥高鮮爲句爲之說曰小山別大山爲鮮
言前后相度高山之處而徙居之其說甚鑿恐不可
從漢后經作高者亦聲之轉也孟子萬章篇舜見瞽
瞍其容有蹙韓非子忠孝篇作舜見瞽瞍其容造焉
蹙從戚聲造從告聲而得相通然則戚聲之轉卽如
告矣高與告聲近故皋字通作高又通作告是其例
也漢后經戚作高正猶蹙之爲造矣讀古書者當依

聲而求字勿逐字而求解浮之爲佛賦之爲高其義
絕遠殆難爲拘文牽義者道矣

承女俾女

傳曰今我法先王惟民之承故承女使女徙

懋謹按俾之訓使蓋本釋詁文然如傳義則俾女下
必增出徙字於文方足矣說文人部俾益也字亦作
𡗗會部曰𡗗益也又通作卑廣雅釋詁曰卑益也俾
與𡗗卑聲義皆同承女俾女者承引女俾益女也與
予告女訓女句法相似說詳上篇

惟喜康其

傳曰惟與女其喜安

樾謹按如傳義則當云惟喜其康於義方明不當云惟喜康其也傳義殆失之矣廣雅釋詁拱固也其拱古通用論語爲政篇居其所而眾星拱之釋文其鄭作拱是也惟喜康其者惟喜安固也康之義爲安其之義爲固康其二字平列上文承女俾女承俾二字亦平列枚說竝于文義未安

予若顙懷茲新邑

傳曰言我順和懷此新邑

樾謹按小爾雅廣詁若女也說文頁部顙呼也予若

顓者予女呼也猶言予呼女也詩匪風篇懷之好音
皇矣篇予懷明德毛傳竝曰懷歸也懷茲新邑者歸
此新邑也言予呼女歸此新邑亦惟女故耳枚氏於
上篇率顓衆咸訓顓爲和此顓字亦訓和段氏玉裁
謂顓音同籥籥音同龠說文龠樂之竹管三孔以和
衆聲也故訓爲和今按蘇齋字竝從龠然則籥之訓
和自是古訓然以率顓衆咸爲率和衆憂之人以予
若顓懷茲新邑爲我順和懷此新邑實于文義未安
學者固不得因枚傳之僞而廢顓和之古訓要不得
因顓有和義而曲從枚傳也

乃咸大不宣乃心欽念以忱動予一人

傳曰女皆大不布腹心故念以忱感動我是女不盡忠

樾謹案枚氏于句讀未審此當以乃咸大不宣爲句乃心欽爲句念以忱動予一人爲句宣者明也僖二十七年左傳未宣其用國語晉語武子宣法以定晉國杜注韋注竝曰宣明也是其義也欽言欽欽然也詩曰憂心欽欽是其義也重言之曰欽欽單言之曰欽古語類然故毛傳鄭箋每以重言釋一言如咥其笑矣傳箋竝曰咥咥然垂帶悸矣傳箋竝曰悸悸然

條其歛矣傳箋竝曰條條然皆其例也爾雅釋詁曰念思也念以忱動予一人與下篇念敬我衆文法正同言汝不憂朕心之所困乃皆大不明乃心欽欽然思以誠意感動予一人冀不遷也枚讀欽念以忱爲句茲上下文皆失其讀矣

爾忱不屬惟胥以沈

傳曰女忠誠不屬逮古苟不欲往相與沈溺

樾謹按經言不屬而傳言不屬逮古增字釋經非經旨也釋文引馬云獨也屬之訓獨蓋以聲訓苟子成相篇剽而獨鹿奔之江楊注曰獨鹿與屬鏤同木或

作屬鏤然則屬之與獨古通用也爾忱不獨義不可
解疑忱字馬本作沈爾沈不獨惟胥以沈言不獨爾
自沈溺且相與共沈溺也獨字胥字正相應成義沈
與忱字形相近詩采薇篇正義引鄭周易注曰慊讀
如羣公謙之謙古書篆作立心與水相近讀者失之
故作慊然則沈之爲忱猶謙之爲慊竝由立心與水
相近之故耳馬注雖存于釋文而因沈誤爲忱遂無
能申明其義者王氏鳴盛謂當云不獨大非古人以
聲相訓之旨矣

今予命女一無起穢以自臭

傳曰我一心命女女違我是自臭敗

樾謹按經言命女一不言一心命女傳義非也一字當屬下讀大戴記衛將軍文子篇則一諸侯之相也荀子勸學篇一可以爲法則盧辯楊倞注並曰一皆也一無起穢以自臭者皆無起穢以自臭也今予命女當自爲句不連一字讀

我先后綏乃祖乃父乃祖乃父乃斷棄女不救乃死傳曰言我先王安女父祖之忠今女不忠女父祖必斷絕棄女命不救女外

樾謹按經文本一氣連屬若如傳義加入今女不忠

一轉恐非經旨也綏當讀爲退文十二年左傳乃皆
出戰交綏杜注曰司馬法曰逐奔不遠從綏不及逐
奔不遠則難誘從綏不及則難陷然則古名退軍爲
綏正義引司馬法云將軍外綏舊說綏卻也是綏與
退古字通也禮記檀弓篇文子其中退然如不勝衣
鄭注曰退或爲妥卽其例矣綏乃祖乃父者退乃祖
乃父也此承上文女有戕則在乃心而言謂女有戕
害人之心我先后已知之必因孫子之不贊而斥退
乃祖乃父於是乃祖乃父亦斷棄女不救乃外也
乃祖乃父丕乃告我高后曰作丕刑于朕孫

釋文曰我高后本又作乃祖乃父

越謹按乃祖乃父丕乃告乃祖乃父義不可通段氏
玉裁謂當於告字絕句此亦曲說也我高后既作乃
祖乃父則乃祖乃父必作我高后釋文既云我高后
本又作乃祖乃父亦必云乃祖乃父本又作我高后
傳寫奪去之耳尋釋文義似以別本爲長上文云茲
予有亂政同位具乃具王此當於政字絕句昭六年
左傳曰夏有亂政而作禹刑商有亂政而作湯刑周
有亂政而作九刑茲予有亂政義與彼同枚傳訓亂
爲治非也同位同在朝廷之位者指羣臣而言羣臣

之貪由于君政之亂故曰茲予有亂政句同位具乃
貝玉於是我高后丕乃告乃祖乃父曰作丕刑于朕
孫朕孫盤庚自謂也上文曷不暨朕幼孫有比枚傳
曰幼孫盤庚自謂然則此文朕孫亦盤庚自謂明矣
以其有亂政故作大刑也上言乃祖乃父乃斷棄女
不救乃死此言高后作丕刑于朕孫一就臣言一就
君言言君臣將同受其罰也上文失于政陳于茲高
后丕乃崇降罪疾曰曷虐朕民女萬民乃不生生暨
予一人猷同心先后丕降與女罪疾曰曷不暨朕幼
孫有比亦是一就君言一就臣言蓋自子念我先神

后之勢爾先至迪高后丕乃崇降弗祥皆反覆申明
不遷之害君臣上下竝有大咎說者誤解茲予有亂
政一節爲責臣之辭則於義偏矣旣以此一節爲責
臣之辭於是疑朕孫當指臣不應出於高后之口遂
改我高后丕乃告乃祖乃父爲乃祖乃父丕乃告我
高后而經意全晦賴有陸氏釋文猶可藉以訂正耳
至下文迪高后之迪乃發端之詞說詳王氏引之經
傳釋詞自改經文爲乃祖乃父丕乃告我高后枚傳
遂訓迪爲道言女父祖開道湯大重下不善以罰女
其不辭甚矣

弔由靈

盤庚下

傳曰弔至靈善也非廢謂動謀於衆至用其善

樾謹按訓弔爲至文義迂曲非經旨也弔訓至亦訓善詩節南山篇不弔昊天毛傳曰弔至鄭箋曰至猶善也棗誓篇無敢不弔正義曰弔訓至也鄭云至猶善也是弔之訓善固尙書家舊說矣弔善也靈亦善也弔由靈者善用其善謀也下文宏茲賁枚傳曰宏賁皆大也善用其善謀謂之弔由靈猶大此大業謂之宏茲賁也若謂弔靈不當並訓善則宏賁亦不當並訓大乎

各非敢違人用宏茲賁

傳曰君臣用謀不敢違人用大此遷都大業

樾謹按此當於用字絕句大誥篇曰甯王惟人用克
綏受茲命今天其相民矧亦惟人用竝以人用連文
此云各非敢違人用義亦然也說文用部用可施行
也從人中是用字本從人中會意尙書人用連文於
本義最近宏茲賁三字爲句與弔由靈一律弔靈皆
善也宏賁皆大也正見古人用字之精又按經云非
敢傳云不敢亦於經義未合蓋盤庚遷殷實不用人
觀中篇無一語及人可知矣不然盤庚方段鬼神禍

福之說以聳動其民使得吉卜亦常如周公大誥屢及之矣何不一言乎當時臣民必有以此爲口實者故盤庚於旣遷之後自解之曰各非敢違卜用也各乃語詞廣雅釋詁各詞也徐鍇說文繫傳於曰篆下云凡稱詞者虛也語氣之助也枚傳不知各爲語詞而以君臣言斯失之矣廣雅各詞也一訓必有所受之王氏念孫疏證疑爲若字之譌非然也

尙皆隱哉

傳曰相隱括共爲善政

樾譚案枚解隱爲隱括是也此必古訓相承如此枚

竊取之而以其爲善政足成之則非其義矣隱括與
櫟栝同荀子性惡篇楊倞注曰櫟栝正曲木之木也
耿俗奢淫逾禮不正甚矣盤庚遷都之意本在於此
故旣遷之後卽欲以法度正之因呼邦伯帥長百執
事之人而告之曰尙皆隱哉欲其去奢淫之舊俗而
就法度也其下曰朕不肩好貨又曰無總于貨寶皆
與去奢行儉之旨合故知漢人所傳爲不虛也漢石
經隱作乘乘字義不可曉疑當爲繩詩絲篇鄭箋曰
乘聲之誤當爲繩也是其例矣淮南子時則篇繩者
所以繩萬物也高注曰繩正也則亦與櫟栝同義今

古文文異而義同上篇曰不能胥匡以生匡亦正也不能胥匡是不就隳枯也然則盤庚以常舊服正法度卽山隱哉一語發其端矣觀其文義盤庚上篇實與下篇相承前人泥于篇第未有能見及此者也

降年有永有不永

高宗彤日

越謹按降年之永不永疑與正厥事無涉正義引鄭注曰年命者憊愚之人尤惛焉故引以諫王也於義亦未安祖己豈當以王爲憊愚之人邪嘗反覆推求於漢書五行志而得此經之旨五行志引劉歆說以爲鼎宗廟之器主器奉宗廟者長子也野鳥自外來

入爲宗廟器主是繼嗣將易也歟此說雖或附會亦必有所自商自陽甲以來諸君享年不永據竹書紀年陽甲四年小辛三年小乙十年惟盤庚二十八年耳高宗承小乙之後見先君皆不永年而彤祭之日又有此異爲繼嗣將易之象必將悚然震動殷本紀云武丁懼懼者懼此也又云祖己曰王勿憂先修政事而已史公增勿憂一語乃善於說經者篇中自惟天監下民典厥義至乃曰其如台皆告王使勿憂也非天天民民中絕命史記作非天天民中絕其命是下一民字當爲衍文天旣孚命漢石經孚作付亦當

從之乎之爲付猶梓之爲柁也祖己之意蓋謂天之降年有永不永非天天民而絕其命也乃民有不若德不懋罪之故耳天旣付命于人人苟能正其德雖有妖孽其柰何哉乃曰其如台與盤庚篇卜稽曰其如台義同猶言越其柰何也說見盤庚上篇祖己因武丁恐懼故爲此言使王勿憂自王司敬民以下始是進戒之詞故以嗚呼發之也古大臣進言于君從容不迫如此是可見其愛君之誠矣然非史公勿憂二字則篇中之義不顯故知西漢經師之說爲可寶也

嗚呼王司敬民罔非天允典祀無豐于昵

傳曰允嗣昵近也歎以感王入其言王者主民當敬
民事民事無非天所嗣常也祭祀有常不當特豐於
近廟

樾謹按傳文當曰典常也傳寫奪典字耳無非天所
嗣釋罔非天允之義典常也祭祀有常釋典祀之義
孔穎達據誤本作正義乃讀傳文民事無非天所嗣
常也允字爲一句而釋之曰民事無非天所繼嗣以
爲常道者也則大非傳義矣然如傳義讀罔非天允
爲句實亦未安疑當以罔非天爲句王司敬民司字

史記作嗣當從之言王嗣位敬行民事罔非天所命也祖已言此者見天降下民作之君人君乃天所命以治民者也其位雖傳之自父其命實受之自天不當私其所親也允典祀自爲句爾雅釋詁曰允繼也典當爲殄考工記勦人是故勦欲順典司農云典讀爲殄是其證也釋詁曰殄絕也允殄祀者繼絕祀也言當繼續其已絕之祀無徒豐於近廟也按殷本紀自祖乙以後陽甲小辛小乙四君皆兄弟相及通典卷五十一引賀循議曰殷之盤庚不序陽甲之廟而上繼先君以弟不繼兄故也賀循此議必尙書家舊

說以其說推之則盤庚止立父祖乙廟而不立兄陽
甲廟小辛之於盤庚小乙之於小辛亦必猶是矣高
宗繼父小乙之後其止立父小乙廟而世父陽甲盤
庚小辛皆無廟從可知也此實當時闕典故祖己以
繼續已絕之祀無徒豐于近廟爲高宗諷也通篇皆
告王使勿憂而其訓于王者止此數語蓋此下尙有
高宗之訓一篇必詳言之而今亡矣此篇告王勿憂
之意爲多故以高宗彤日名篇下篇所載當詳言其
所訓于王之事故以高宗之訓命篇也不然何不分
爲上下兩篇而必異爲之名乎

天既訖我殷命

西伯戰黎

樾謹按是時殷猶未亡乃云既訖我命義不可通古書既與其每通州禹貢離淄其道史記夏本紀作既道詩常武篇徐方既來荀子議兵篇引作徐方其來竝其證也天既訖我殷命當作天其訖我殷命蓋以格人元龜罔敢知吉故推度天意如此也此篇以天其訖我殷命發端猶微子篇以殷其弗或亂正四方發端也皆事前推度之辭若作既訖則似乎事後之論矣

格人元龜

傳口至人以人事觀殷大龜以神靈考之皆無知
吉 正義曰格訓爲至至人謂至道之人有所識解
者也

樾謹按至道之人謂之至人義殊未安元大也格亦
大也元龜者大龜也格人者大人也史記格作假爾
雅釋詁假大也方言曰凡物之壯大者而愛偉之周
秦之間謂之假此經字雖作格義與假同卽以格至
之義而論釋詁曰睭大也釋文曰本又作至然則至
亦大也格之義爲至卽爲大矣凡有大義者皆有美
善之義元訓大亦訓善卽其例也論衡卜筮篇引此

經而釋之曰賢者不舉大龜不兆是王仲任以格人
爲賢者義自可通孔穎達以爲至道之人則失之矣
指乃功

傳曰言殷之就亡指女功事所致

樾謹按枚傳未解指字之義指致也言致極爾之事
必將爲戮也詩武篇耆定爾功毛傳曰耆致也指與
耆古字通用皇矣篇上帝耆之潛夫論班祿篇引作
上帝指之是其證也書言指乃功詩言耆爾功文異
而義同美惡不嫌同辭

我祖底遂陳于上

微子

傳曰言致遂其功陳列於上世

懋謹按底遂陳于上蓋以德言下文曰我川沈酗于酒川亂敗厥德于下紂所亂敗者卽湯所底遂而陳者也上句不言德者文見於下故省于上古人自有此文法也傳不知此而增出功字失之

我川沈酗于酒

懋謹按無逸篇傳以酒爲凶曰酗是枚氏所據本固作酗故其說如此必非枚氏私造此字而自爲之說也陸德明謂說文作酗然說文酗篆下並不引此經壁中古文作酗與否未可知也玉篇酉部酗許具切

兕酒曰醕醬又出醕字曰同上玉篇之字多本於說
文安知古本說文醕篆下不更有重文作醕者乎鄭
康成注周官司救亦有醕醬之文不得謂漢時無醕
字矣蓋醕者會意字也醕者形聲字也經典相承之
字苟合六書之旨皆可各從其舊江氏聲必謂醕不
成字改從說文作醕失之泥矣

好草竊姦宄

傳曰草野竊盜又爲姦宄於外內

樾謹按枚氏解草竊之義殊爲望文生訓江氏聲曰
芴害苗爲草竊引呂氏春秋辨上篇文爲證然彼文

云夫四序參發大畝小畝爲青魚肚苗若直獵地竊之也旣種而無行耕而不長則苗相竊也弗除則蕪除之則虛則草竊之也此自是呂氏誤造之語非古人名莠害苗爲草竊也不得因草竊二字適與此經合遂引以爲證依此皇衍引廣雅釋言鈔掠也謂與草聲相近其詁視江氏爲長然讀草爲鈔於古無徵如其說則盜聲與草聲亦相近直讀爲盜竊豈不更徑易乎江孫兩說殆皆未塙今按竊當讀爲蔡莊子庚桑楚篇竊竊乎又何足以濟世哉釋文曰竊竊本作察察然則竊之爲蔡猶竊竊之爲察察也草竊者

草蔡也說文才部丰艸蔡也象艸生之散亂也是草
蔡有散亂之義古語然也其本義屬草引而申之則
凡散亂者皆得謂之草蔡故與姦宄連文好草蔡卽
好亂也草蔡之語止見于許氏之書他無所見古語
久湮而此經又段竊爲蔡於是其義益晦矣

凡有辜罪乃罔恆獲

傳曰皆有辜罪無秉常得中者

懃謹按經文止有獲字無中字傳義非也詳此經之
義正收誓所謂乃惟四方之多罪逋逃是崇是長是
信是使是以爲大夫卿士者昭七年左傳曰周文王

之法曰有亡荒闕所以得天下也又曰昔武王數紂之罪以告諸侯曰紂爲天下逋逃主萃淵藪皆可以說此經蓋文王之法有罪人逃亡則大蒐其衆期于必得而紂則反是故當時以爲逋逃之淵藪凡有辜罪者乃罔恆獲也罔恆獲猶言常不得使餉其文曰乃恆罔獲則其義便明顯而非古書佶屈之體矣我其發出狂我家耄遜于荒今爾無指告予顛隲若之何其

懋謹按史記宋微子世家曰微子度紂終不可諫欲死之及去未能自決乃問于太師少師是微子之問

有一死一去兩意故上文旣決殷之淪喪又特呼父
師少師而發此問乃微子作誥之本意也我其發出
狂此去之之說也狂史記作往集解引鄭注曰發起
也紂禍敗如此我其起作出往也是其義也吾家堯
遜于荒此死之之說也正義引鄭注曰堯亂也蓋不
忍斥言紂昏亂故言吾家昏亂與上文我用沈酗于
酒不言紂而言我語意正同遜古與馴通故堯典五
品不遜史記五帝紀作馴周易坤六二象傳曰馴致
其道釋文引向秀曰馴從也荒讀爲亡下文天毒降
災荒殷邦史記作天篤下災亡殷國是讀荒爲亡正

古文家說此荒字當亦同也吾家耄遜于荒言吾家
亂而從于亡蓋欲從紂死不忍斥言故微其詞也微
子之意若曰我其發出往乎抑吾家亂而從于亡乎
今爾無指告我則或去或死不知所從無所措手足
矣故曰予顛隤也若之何其乃致其問之之意故傳
謂如之何其救之亦非當日語意也微子之意晦于
千載賴史公數語猶可得其梗概耳吾家耄遜于荒
史記作吾家保于喪保耄同聲惟無遜字疑或奪誤
然觀上句狂字史記作往此句荒字史記作喪則微
子一去一外兩意居然可見下文詔王子出迪蓋就

微子之意而爲決之也

降監殷民用又讎斂召敵讎不怠

傳曰下視殷民所用治者皆重賦傷民斂聚怨讎之道而又亟行暴虐自召敵讎不解怠

越謹按如傳義則讎斂與召敵讎一也何必重複言之乎釋文曰讎如字下同此依傳義作音也又曰徐云鄭音疇馬本作稠云數也是鄭本上讎字與下異讀馬本則并異其字矣段氏玉裁謂鄭亦讀讎爲稠非也鄭蓋讀讎爲疇故徐云鄭音疇也一切經音義卷一引國語賈注曰一井爲疇九夫爲一井孟子盡

心篇易其田疇船注亦曰疇一井也鄭讀離爲疇當從此訓殷制用助法上所應得者惟公田所入而已其外皆民之私田上不得而斂之也此云疇斂則是按井而斂之是所取不止公田矣殆紂時所加賦歟又當爲刈據說文又刈本一字也王逸注離騷曰刈穫也降監殷民川又疇斂言下視殷民方用刈穫之時計疇而斂之也鄭義每存乎音以音求之往往可得其義矣

羣經平議卷四

羣經平議卷五

德清俞樾

尚書三

王朝至于商郊牧野

牧誓

傳曰紂近郊三十里地名牧正義曰繼牧言野明是牧地而鄭元云郊外曰野將戰于郊故至于牧野而誓豈王行已至于郊乃復倒退適野誓訖而更進兵乎何不然之甚也

樾謹按此當以郊牧野三字連文爾雅釋地邑外謂之郊郊外謂之牧牧外謂之野此正釋尚書郊牧野

三字之義合言之曰郊牧野從省則但曰牧野詩大明篇牧野洋洋是也又從省則但曰牧國語周語曰庶民弗忍欣戴武王以致戎于商牧是也此篇以牧誓名篇是武王作誓實在郊外之牧而史臣併舉郊野者是時諸侯會者八百車徒衆多其所屯聚必非一處前軍及郊後軍至野中軍在牧亦情事所應爾也鄭注稱郊外曰野是鄭君所見爾雅與今本異然據尙書以治爾雅則固以今本爲長矣又爾雅此篇之後總題曰野蓋野者對邑而言邑外郊郊外牧牧外野野外林林外坰雖分五名然郊牧林坰實皆野

也故亦有稱牧之野者詩閟宮篇致天之祠于牧之
禮人傳篇曰牧之野武王之大事也牧稱牧之野
猶圉稱圉之野駟篇曰駟馴牡馬在圉之野是也圉
之野卽林外之圉牧之野卽郊外之牧若以牧爲地
名豈圉亦魯之地名乎

惟家之索

傳曰索盡也

樾謹按惟家之盡于義未安枚說非也周官方相氏
以索室毆疫卽此索字之義牝雞晨鳴必有妖孽當
索室以毆除之故曰惟家之索武王以諸侯伐紂爲

天下除暴亂亦猶索室歐疫也故以爲喻耳

昏棄厥遺王父母弟不迪

樾謹按隸釋載石經作厥遺任父母弟不迪段氏王
裁謂未知今文家說如何其實乃誤字也漢人隸書
王王二字往往無別武梁石室畫象秦王作秦王又
魯峻碑陰王端王輔竝卽王字可證也文七年左傳
宋公王臣卒釋文曰本或作王臣蓋亦隸體混淆之
故此經王字漢人書作王字因又加人旁作任耳韓
非子外儲說左篇王登爲中牟令呂氏春秋知度篇
作任登卽其例也蔡邕等正定六經文字而此等字

未能正定固其小疏或因經師舊讀學者共曉字雖作任讀仍爲王相習已久無庸改易其舊耳懼好古之上不加詳審或滋異說故具論之不迪之迪當讀爲由漢書楊雄傳注曰迪由也是迪與由聲近義通由者用也故周本紀卽作不用蓋史公讀迪爲由而以詁訓字易之也枚傳曰不接之以道迂矣

弗迂克奔以役西土

傳曰商衆能奔來降者不迎擊之如此則所以役我西土之義

樾謹按經但言奔不言降經但言迂不言擊經但言

役西土不言役西土之義傳義非也史記周本紀弗
迂作不禦集解引鄭注曰禦彊禦謂彊暴也克殺也
不得暴虐殺紂師之奔走者以爲周之役也其說亦
甚迂曲蓋說此經者皆先有成見以爲聖人仁義之
師宜乎其言藹如然後相稱不知上文明言尙桓桓
如虎如貔如熊如羆于商郊下文又言勛哉夫子爾
所弗勛其于爾躬有戮則此文必是勉以殺敵致果
方今作誓之本旨不當如先儒所云也迂字宜從史
記作禦廣雅釋詁禦止也字亦通作衙釋名釋樂器
曰衙止也弗禦者弗止也軍旅有進無退故勉以弗

止也克奔以役西土六字爲句奔讀如奮詩行葦篇
毛傳奔軍之將釋文曰奔音奮是奔得讀如奮也克
奔以役西土者克奮發以從我西土之役也此篇本
爲友邦冢君及從征庸蜀諸國而作故有以役西土
之語自尙桓桓以下至克奔以役西土文義本一氣
連屬欲其尙克如此也學者失其義因失其讀矣

惟天陰隲下民

洪範

傳曰隲定也天不言而默定下民正義曰傳以隲
卽質也質訓爲成成亦定義故爲定也

樾謹按宋世家作維天陰定下民疑史公讀隲爲敕

建用皇極

傳曰皇大極中也

樾謹按以皇極爲大中固古義也然下文言皇建其有極惟皇作極一以大中訓之實有不可通者蔡傳曰皇君也極猶北極之極至極之義標準之名其說殊勝下文曰皇極之敷言又曰凡厥庶民極之敷言蓋以皇極庶民極相對爲文說本馬注見史記集解

然則皇之爲君無疑矣極爲準則蓋亦古有此義詩
殷武篇商邑翼翼四方之極猶言四方之準則也後
漢書樊準傳引作四方是則李賢注曰韓詩之文蓋
極有準則之義故毛詩作極韓詩作則也昭十三年
左傳貢獻無極猶言貢獻無有準則也上文曰貢之
無藝服注曰藝極也杜注曰藝法制藝與極同義藝
爲法制則極亦法制矣周禮序官設官分職以爲民
極民極者民之準則也猶云以爲黔首則也國語越
語無過天極天極者天之準則也猶云順帝之則也
月斯之類皆可證成其義

金曰從革

傳曰金可以改更 正義曰金可以從人改更
槩謹按枚傳不說從字之義史記集解引馬融曰金
之性從人而更正義卽本馬注然其說殊未安木之
曲直亦是從人何獨於金言之乎從革猶言因革也
漢書外戚傳注曰從因也由也蓋從與由義同詩南
山篇衡從其畝釋文曰從韓詩作由是也由之義爲
因故從之義亦爲因金之性可因可革是爲從革猶
木之性可曲可直是爲曲直也

四曰司空

傳曰主空土以居民

樾謹按史記集解引馬融之說亦與枚同白虎通封公侯篇曰司空主土不言土言空者空尙主之何況於實此說殊爲迂曲疑司空之空當讀爲工以空爲工猶以功爲工以紅爲工也周官肆師職凡師不功鄭注曰古者工與功同字漢書哀帝紀害女紅之物如漶曰紅亦工也是工字可從力作功從糸作紅則亦可從穴作空矣蓋古人作字有省偏旁者如以取爲賢之類亦有加偏旁者如以割爲害之類試以尙書言之大誥篇殷小腆主肅曰腆主也則腆卽典字

也呂刑篇明明棐常墨子作明明不常則棐卽非字也然則空卽工字復何疑乎冬官主百工之事故謂之司工其職雖亡而小宰職曰冬官掌邦事不曰冬官掌邦土則司空之爲司工明矣工與功通功者事也惟其司工故掌邦事也冬官亡而以考工記補之未爲無見王制曰司空執度地居民此乃匠人之事固亦冬官所屬且其下文曰興事任力則仍是掌邦事非掌邦土也後人不知空爲工之段字因有主空土之說而僞古文遂曰司空掌邦土矣

而康而色

傳曰女當安女顏色以謙下人

樾謹按下而字訓女上而字不訓女乃語詞也此句承上文皇則受之而言皇則受之而康而色言不但受之而又當和女之顏色以受之也康之義爲安故亦爲和史記樂書正義曰康和也枚傳因皇則受之與上文女則念之相對念之下更無他文則受之下亦不得箸此四字乃以此四字屬下爲義其所見殊泥矣

是彝是訓

傳曰不失其常則人皆是順矣

越謹按枚傳以順字解訓字蓋本之史記不知下文
于帝其訓是訓是行兩訓字史記作順至此句作是
夷是訓不作順也集解引馬注曰是大中之道而常
行之用是教訓天下是馬本於此句亦不作順也惟
馬以彝爲常不如史公以彝爲夷夷陳也是夷是訓
者是陳列之是訓教之也此以君言也下文曰是順
是行者是順從之是奉行之也此以民言也君宜順
天故曰于帝其順民宜從君故曰以近天子之光下
兩訓字讀爲順此一訓字讀如本字史公分別最明
枚混而一之誤矣

一曰正直

傳曰能正人之曲直

樾謹按經言正直不言正曲直傳義非也正直與剛克柔克竝爲三德義當一律正直者以正道相切直也剛克柔克者以剛柔相克治也爾雅釋訓曰丁丁嚶嚶相切直也郭注曰以喻朋友切磋相正此直字之義也故其下曰平康正直彊弗友剛克變友柔克沈潛剛克高明柔克言平康者以正道相切直而已彊弗友者沈潛者宜以剛克之變友者高明者宜以柔克之也如傳義則不可通矣

曰克

傳曰兆相交錯

樾謹按兆相交錯何以謂之克正義引鄭注曰克者如雨氣色相侵入史記集解引鄭注曰克者如殺氣之色相犯也雨文不同而皆從侵克取義然則何不竟謂之祲與雨霽圍霽一律乎今按說文克部克肩也象屋下刻木之形重文泉曰古文夫克旣訓肩何以又取象刻木於義不可解疑古文作泉者乃尙書洪範曰克之本字壁中古文也其上從占以其爲占之用也其下作水象其形也雨霽圍霽有可取象而

桌則無可取象故特製此字猶卦有八皆段他字以
命之而特製坤艮二字聲有五皆段他字以命之而
特製霸一字也桌字之義或解爲侵克或解爲交錯
皆各就其下之木爲說刻木一義亦必尙書家舊說
也因桌字讀如克後人遂卽以克字爲之亦猶艸止
作𦵏𦵏止作羽也許氏因以桌爲克之古文不特尙
書曰克之義不可知并克篆說解而亦失之矣說文
下部𦵏易卦之上體也從卜每聲商書曰貞曰𦵏然
則曰克之克壁中古文作桌亦猶曰悔之悔壁中古
文作𦵏從占與從卜同也許氏惜未表而出之耳

四曰攸好德

傳曰所好者德福之道 正義曰鄭云民皆好有德也王肅云言人君所好者道德爲福洪範以人君爲主上之所爲下必從之人君好德故民亦好德事相通也

懋謹按鄭王及枚氏之說皆讀好爲好尙之好漢書五行志曰貌之不恭其極惡順之其福曰攸好德此今文家說以好德與惡對則好字讀如美好之好其說似較古文爲長蓋以好人之德爲福不如自有美好之德更爲福也古字攸與修通史記秦始皇紀德

惠修長索隱曰王劭按張敞所錄會稽南山秦始皇
碑文修作攸是其證也攸好德卽修好德人能修飾
其美德如孟子所謂飽乎仁義不願人之膏粱令聞
廣譽施於身不願人之文繡是亦福也張表碑曰令
德攸兮攸亦修之段字令德卽好德也疑今文家固
以攸爲修矣

若爾三王是有丕子之責于天

金滕

傳曰大子之責謂疾不可救於天 正義曰責謂負
人物也大子之責於天言負天一大子

懋謹按傳義不了正義說更迂曲矣又引鄭注曰丕

讀爲不愛子孫曰子元孫遇疾若女不救是將有不
愛子孫之過爲天所責欲使爲之請命也此說視枚
爲長而以上下文勢求之則亦未安今按是通作實
故秦誓篇是能容之禮記大學篇作實能容之也若
爾三王實有不子之責于天以旦代某之身三句一
氣連屬丕字史記作負負子者諸侯疾病之名禮記
曲禮篇正義引白虎通曰天子病曰不豫言不復豫
政也諸侯曰負子子民也言憂民不復子之也是負
子之義本爲不子故此經作丕子丕與不古通用也
桓十六年公羊傳何休解詁又曰天子有疾稱不豫

諸侯稱貢茲古文以聲爲主無定字耳凡人有病則
須子孫扶持之周公事死如生故仍以人事言謂爾
三王在天若有疾病扶持之事必須子孫任其責則
請以旦代某也下文曰乃元孫不若旦多材多藝不
能事鬼神可知此文所言是事鬼神之事矣三王生
前皆未爲天子故仍從諸侯之稱也自來說者未達
此義惟孔氏廣森經學卮言解丕子二字與愚合然
孔氏以丕子屬武王言謂告神謙故從諸侯病辭則
非也武王有疾可云丕子不可云有丕子之責于天
且與上文若爾三王文義不貫而與下文能事鬼神

之意亦不屬矣

予仁若考能多材多藝

傳曰我周公仁能順父又多材多藝能事鬼神
正義曰考是父也故仁能順父既能順父又多材多藝
能事鬼神言已可以代武王之意

檇謹按如傳義則是改經文爲予仁能若考矣且既
告三王亦不應專稱考傳義非也史記魯世家作且
巧能多材多藝王氏念孫曰考巧古字通若而語之
轉予仁若考者予仁而巧也故能多材多藝能事鬼
神其說見經義述聞今按王說是矣然未盡也仁當

讀爲佞說文女部佞巧譎高材也大徐本作從女信
省小徐本作從女仁聲段氏玉裁曰晉語佞之見佞
果喪其田古音佞與田韻則仁聲是也佞從仁聲故
得假仁爲之予仁若考者予佞而巧也佞與巧義相
近仁與巧則不類矣史記周本紀爲人佞巧亦以佞
巧連文是其證也古人謂才爲佞故自謙曰不佞佞
而巧故多材多藝能事鬼神也至多材多藝上以文
義論之似不必有能字江氏聲集注以仁若二字爲
衍文讀巧能二字爲句孫氏星衍注疏讀仁若巧能
四字爲句義均未安古能而二字通用履六三眇能

視跛能履李氏集解本能皆作而虞注曰眇而視跛而履鹽鐵論忠焉能勿誨乎愛之而勿勞乎崔駰大理箴或有忠能被害或有孝而見殘皆能而通用之證子仁若考能多材多藝者若而也能亦而也猶曰予伎而巧而多材多藝也此能字與能事鬼神之能不同故下文曰乃元孫不若且多材多藝不能事鬼神多材多藝上不更箸能字可知兩能字不同也

數佑四方

傳曰布其德教以佑助四方

樾詳案枚訓數爲布而增出德教字以成其義非經

旨也史記集解引馬注曰布其道以佑助四方其失
亦與枚同敷之言徧也詩賚篇曰敷時繹思鄭箋曰
敷徧也字通作普亦通作溥詩般篇曰敷天之下北
山篇曰溥天之下孟子萬章篇曰普天之下是敷溥
普文異義同佑乃俗字當作右而讀爲有儀禮有司
徹篇右几鄭注曰古文右作侑右侑通用故右有亦
得通用宣十五年公羊傳曰潞子離於狄而未能合
於中國晉師伐之中國不救狄人不有不有卽不右
言狄人不助也彼段有爲右此段有爲有聲同者義
亦同古書多段借以聲爲主不泥其形也敷佑四方

者普有四方也言武王受命于帝廷普有四方爲天下主也

乃井是吉

樾謹案三卜皆吉一言可蔽旣曰一習吉又曰乃井是吉何也井當作併竝也說文从部井相從也人部併竝也二字義亦可通乃併是吉言王與周公竝吉也上文曰我其以璧與珪歸俟爾命史記集解引馬注曰待爾命武王當愈我當死也蓋周公本意請以身代三龜皆吉則武王當愈不待言矣武王愈周公宜死及啓籥見書更詳審之乃知王與周公竝吉也

不然則上文以旦代某之言更無歸宿一似聖人苟
爲美詞以冀動聽自言而自食之斯不然矣下文公
曰體王其罔害此決武王之不死也又曰予小子新
命于三王惟永終是圖此知己亦不死也惟永終是
圖當卽書中之詞其後武王既喪周公相成王成文
武之德所謂永終是圖者至此乃驗大王王季文王
實段卜以命周公而公知之也故曰予小子新命于
三王而其後告二公之言亦曰我之弗辟我無以告
我先王正以受命先王故也史記魯世家載周公告
大公望召公奭曰大王王季文王三王之憂勞天下

久矣於今而後成此卽周公受命三王永終是圖之意也乃并是吉史記作乃見書遇吉論衡卜筮篇曰周武王不豫周公卜三龜公曰乃逢是吉蓋今文尙書并作逢故史公以爲遇吉不知逢卽併也逢聲之轉與旁相近史記龜策傳曰桀有諛臣名曰趙梁教爲無道勸爲貪狼繫湯夏臺殺關龍逢逢與梁狼爲韻後世因誤有從夆從夆之別廣韻三鍾收逢字四江收逢字其實則一聲之轉也是故併之爲逢猶竝之爲傍也列子黃帝篇竝流而承之釋文曰竝音傍史記秦始皇紀竝河而東集解引服虔漢書注曰竝

音傍竝之爲傍併之爲逢皆聲之轉文異而義實不異也史公易以遇字失之矣

公曰體

傳曰公視兆曰如此兆體王其無害言必愈

樾謹按體字以一言爲句乃發語之辭慶幸之意也詩氓篇曰爾卜爾筮體無咎言釋文曰體韓詩作履幸也然則體亦猶幸也禮記玉藻篇君定體鄭注曰體視兆所得也以此文周公曰體爲證然則鄭已不得其解枚襲其說更無譏矣

周公居東二年則罪人斯得

傳曰周公既告二公遂東征之二年之中罪人此得
樾謹按經文止言居東則非東征也故上文我之弗
辟馬鄭皆以爲避居東都此文罪人斯得其非謂誅
管蔡明矣詩鴟鴞篇正義引鄭注曰罪人周公之屬
黨盡爲成王所得謂之罪人史書成王意也此亦不
然成王當日容或以周公之黨爲罪人及事旣大白
卽成王亦知其無罪矣豈有史官於事後作史冊以
傳信後世而仍謂之罪人乎蔡傳曰二年之後王始
知流言之爲管蔡此亦不然夫是非曲直必無竝行
之理旣知管蔡流言則又何疑乎周公乃必待風雷

之變發金縢之書而後悔而迎公平今按罪人斯得
之文卽承周公居東二年之後是周公得之而非成
王得之也所謂得之者謂得流言之所自起也上文
曰管叔及其羣弟乃流言於國此自史臣事後紀實
之辭若當其時則但聞公將不利於孺子之言播滿
國中其倡自何人傳自何地非獨成王與二公不知
雖周公亦不知也及居東二年乃始知造作流言者
實爲管蔡故曰罪人斯得詩皇矣篇皇赫斯怒板篇
無獨斯畏鄭箋竝曰斯盡也其注此經曰盡爲成王
所得則亦訓斯爲盡罪人斯得者言盡得其主名也

墨子耕柱篇周公旦非關叔辭三公東處于商蓋此
周公避居之明證關叔卽管叔商蓋卽商奄皆古文
假借字也周公旣至商奄與東人相習故能盡得其
狀而王與二公則猶未之知也此當日之情事故於
其避居東也可見周公之仁而於罪人之盡得也可
見周公之智

知曰其有能格知天命

大義

傳曰安人且猶不能況其有能至知天命者乎

樾謹按漢書翟方進傳載王莽大誥作況其能往知
天命以格爲往乃古訓也爾雅釋言格來也訓格爲

往如亂爲治故爲今之例蓋物之旣來謂之格物未
來而我往逆之亦謂之格僖十五年左傳格秦伯宣
二年傳狂狡格鄭人杜注竝曰格迎也格卽格字因
戰陳必用車故以從車之格字爲之其實卽格來之
義所引申也莊子人間世篇釋文引崔云逆擊曰格
此蓋合格格二字之義爲說逆者格之訓擊者格之
訓格與格格竝從各聲其義得通故格訓逆擊也格
知天命猶曰逆知天命莽用雅訓以易經文當云來
知天命乃不曰來而曰往者欲人易曉也枚傳云至
知天命則仍是來字之義泥于古訓不能變通正義

曰其能至於知天之大命則恐并失枚意矣

予不敢閉于天降威用

傳曰天下威用謂誅惡也言我不敢閉絕天所下威用而不行將欲伐四國

樾謹按王莽大誥作予豈敢自比於前人乎天降威明用甯帝室遺我居攝寶龜是莽讀此誥於予不敢閉絕句其作比者必今文家說於義似短然其句讀則是也上文云敷賁敷前人受命此閉字正與兩敷字相應惟不敢閉故敷陳之也于字莽誥所無孫氏星衍讀于天降威四字爲句引釋詁粵于也爲解然

下文天降威知我國有疵民不康無于字酒誥曰天降威我民用大亂喪德亦無于字疑此于字本在開字之上予不敢于閉猶下文曰敢弗于從傳寫誤倒之耳用字屬下讀用甯王三字如莽誥之義則爲天用甯我王室然甯王字篇中屢見自當從枚傳以爲文王君奭篇正義引鄭注曰甯王文王也枚義卽鄭義也天降威用甯王遺我大寶龜紹天明卽命曰有大艱于西土西土人亦不靜此天降威命用甯王所遺之寶龜以告我也卽命者卽寶龜以命之也蔡傳以有大艱二語爲龜兆預告甚得其旨但以用字屬

上讀則尙仍枚傳之失耳

天降威知我國有疵民不康曰予復反鄙我周邦

樾謹按王莽大誥曰天降威遣我寶龜固知我國有
咎災使民不安是天反覆右我漢國也據此則予復
反鄙我周邦七字當作一句蓋今文家讀如此於義
殊勝當從之曰與上文卽命曰同乃天段寶龜以告
也復反猶反復也誥有倒順耳禮記月令篇命舟牧
覆舟五覆五反先言覆後言反與此正同蓋反復復
反義皆得通後人習聞反復越聞復反故於此經失
其解也鄙當作曷經傳皆通用都鄙字而曷廢矣說

文面部畱畱也畱部畱愛瀆也畱爲畱卽爲愛瀆故
莽詰作右右之言助也愛之斯助之矣是其義通也
畱聲右聲據段氏說文同在古音第一部是其音亦
相近也予者設爲天之言與詩予懷明德同予復反
畱我周邦者蓋愛之甚則必反復之詩蓼莪篇顧我
復我鄭箋曰復反覆也卽可以說此經矣疑此句與
上文有大艱云云相屬當日以寶龜卜之其詞蓋曰
有大艱于西土西土人亦不靜予復反畱我周邦三
句皆卜詞也周公述卜詞未畢而閒以越茲蠡殷小
腆誕敢紀其敘數語者見卜詞之有徵也於是將再

述卜詞故又以天降威發之猶曰天降威用甯王遺
我大寶龜紹天明也因其詞繇故省之耳莽誥天降
威下更有遺我寶龜四字此可證矣知我國有疵民
不康者卽括上文有大難二語之意國有疵卽所謂
有大難于西土也民不康卽所謂西土人亦不靜也
重言之則於文複矣故約其意如此見卜詞本相屬
也下文曰朕卜并吉又曰予得吉卜蓋因卜詞有予
復反圖我周邦一語故云然天意如此則吉可知矣
若止曰有大難于西土西土人亦不靜安知其吉與
否乎

今蠶今翼日

傳曰今天下蠶動今之明日

樾謹按今之明日義不可通疑今蠶今翼兩義相對
翼本作翌衛包改作翼說詳段氏誤異說文虫部蠶
蟲動也羽部翊飛貌翌卽翊之變體蠶以蟲喻翊以
鳥喻字又變作雅文選吳都賦趨譚雅獮李注曰相
隨驅逐衆多貌上文越茲蠶專以武庚言此文今蠶
今翌則見武庚蠶動而淮夷從之雅獮衆多也日字
屬下爲義文七年左傳日衛不睦襄二十六年傳日
其過此也昭七年傳日君以夫公孫段爲能任其事

十六年傳日起請夫環竝與此日字同蓋左氏正因
尚書有此文法而循用之耳日民獻有十夫子翼言
近日民之賢者十夫來翼佐我也枚傳見翌日連文
適與金縢篇同遂讀今翌日爲句誤矣

天棐忱辭其考我民

傳曰言我周家有大化誠辭爲天所輔其成我民矣
樾謹按下文曰越天棐忱康誥曰夫畏棐忱君奭曰
若天棐忱竝于忱字絕句此亦當然自來以天棐忱
辭爲句非也棐之訓輔雖本爾雅釋詁文然古字多
段借不得概以本字釋之經凡言棐忱者竝當讀爲

非古斐匪字通漢書地理志錄禹貢文凡貢匪之匪
皆作斐然則段斐爲非猶段匪爲非也呂刑明明斐
常枚傳亦以爲輔行常法然墨子尚賢篇作明明不
常則固讀斐爲非矣君奭篇天難諶漢書王莽傳引
作天應斐忱此可見凡言斐忱者猶言非忱也辭字
屬下讀辭籀文作𠂔壁中古文亦必作𠂔乃嗣之段
字此承予不敢不極卒甯王圖事而言嗣其考我民
者謂天命不常嗣王宜先成我民也高宗彤日篇王
司敬民史記作王嗣敬民此經云嗣其考我民文義
正相近作司作辭竝段字也莽誥作天輔誠辭則失

其讀久矣

厥子乃弗冑堂矧冑構

傳曰子乃不冑爲堂基況冑構立屋乎

樾謹按經言堂不言堂基傳必增基字者以其對構而言疑堂亦必構立而成弗冑堂矧冑構於義未安故增基字以成其義也若然則經文何不卽云弗冑基而必云弗冑堂乎傳義非也蓋古所謂堂者有二其一爲前堂後室之堂其一爲四方而高之堂禮記檀弓篇吾見封之若堂者矣鄭注曰堂形四方而高是知古人封土而高之其形四方卽謂之堂故文選

西京賦注引宋均大元經注曰堂高也廣雅釋詁曰堂明也堂之義爲高爲明則堂之制可見矣金滕篇釋文曰壇馬云土堂楚辭大招篇南房小壇王逸注曰壇猶堂也夫壇與堂得通稱則堂之制又可見矣楊倞注荀子疆國篇曰明堂壇也謂巡守至方岳之下會諸侯爲宮三百步四門壇十有二尋深四尺加方明其上以楊氏此注考之則方岳下之明堂皆是封土爲壇非有如周書所謂四阿反坫重亢重郎者也疑堂之初制止是如此故室字從小而堂字從土不從宀也此經以堂構對言見封土以爲堂且不可

又安責其構立屋乎經文本極分明後人不達古制故失其解

紹聞衣德言 康誥

傳曰繼其所聞服行其德言

樾謹按服行其德言謂之衣德言不辭甚矣衣疑扶字之誤乃古文旅字也書序曰周公既得命禾旅天子之命作嘉禾枚傳訓旅爲陳旅德言者陳德言也言布陳其德言也因古文作扶故誤爲衣字耳古書扶誤作衣者往往有之周書武稱篇冬寒其衣服衣字亦當作扶而讀爲稽今誤作衣而又衍服字矣官

人篇愚依人也依字亦當作伏而讀爲魯今誤作衣而又加人旁矣其說詳見周書尚書與周書同出周初史臣之手故其文字有可參考也

無康好逸豫

傳曰無自安好逸豫寬身其乃治民

樾謹按經文豫字衍文也傳以自安釋康字以逸豫釋逸字非經文有豫字也僞五子之歌曰太康尸位以逸豫滅厥德故枚傳遇逸字每以逸豫釋之酒誥不敢自暇自逸傳曰不敢自寬暇自逸豫無逸篇君子所其無逸傳曰歎美君子之道所在念德其無逸

豫又云先知稼穡之艱難乃逸傳曰稼穡農夫之艱
難事先知之乃謀逸豫又云乃逸乃諺傳曰乃爲逸
豫遊戲乃叛諺不恭又云生則逸傳曰生則逸豫無
度多方篇有夏誕厥逸傳曰有夏桀不畏天威而大
其逸豫又云爾乃惟逸惟頗傳曰若爾乃爲逸豫頗
僻凡此之類皆以逸豫釋經文逸字經文止言逸不
言逸豫也此經豫字卽涉傳文而誤衍耳漢書武五
子傳母桐好逸蓋康聲轉而爲空與同聲相近故古
文尙書作康今文尙書作桐也然則逸下無豫字有
明證矣當據以訂正

自作不典

傳曰自爲不常

樾謹按典當讀爲腆儀禮記辭無不腆燕禮寡君有不腆之酒鄭注竝曰腆善也自作不腆者自作不善也古典與腆通用大誥殷小腆王肅曰腆主也是肅讀腆爲典也典主之典可作腆故腆善之腆可作典矣多方篇爾乃自作不典義同

非終乃惟胥災

樾謹按潛夫論述赦篇引作乃惟胥哉當從之上文云非胥乃惟終胥下無災字則此文宜亦無災字也

乃惟書哉與洛誥乃時惟不永哉文法正相近哉災聲近因而致誤耳

適爾

樾謹按傳及正義均不解適字之義一切經音義六華嚴經音義上竝引三蒼曰適始也然則適爾者始爾也正見其非終也

有敘時乃大明服

傳曰歎政教有次敘是乃治理大明則民服

樾謹按僖二十三年左傳周書有之曰乃大明服荀子富國篇書曰乃大明服據左荀所引知時字當屬

上讀然有敘時三字文義難明上文曰越厥邦厥民
惟時敘下文曰乃女盡遜曰時敘疑此文亦當作有
時敘而誤倒之耳有時敘者有是次敘也有是次敘
則治理大明而民服矣

非女封刑人殺人無或刑人殺人非女封又曰劓刑人
無或劓刑人

樾謹按釋此經者皆以刑人殺人與劓刑人爲對文
又曰二字遂不可解夫劓刑人卽刑人也本非對舉
之辭當讀非女封刑人殺人爲句無或刑人殺人非
女封爲句言非女封手自刑人手自殺人也然凡刑

人殺人無非女封爲政不可不慎也又曰之又讀爲
有有曰劓刵人無或劓刵人者言人告女曰此人當
劓此人當刵則有之矣然劓之刵之仍由女封他人
無得而劓之無得而刵之也刑人如此殺人從可知
舉輕以見重正申明無或刑人殺人非女封之意下
文云又曰要囚服念五六日至于旬時丕蔽要囚又
亦當讀爲有言人有曰要囚女必服念至旬時然後
丕蔽要囚也與又曰劓刵人無或劓刵人兩文一律
又按尙書每有又曰之人多士篇又曰時予乃或言
爾攸居君奭篇又曰天不可信又曰無能往來多方

篇又曰時惟爾初不克敬與和諸稱又曰者皆未詳
何義君奭篇正義曰此經言又曰傳不明解鄭云人
又云則鄭以此又曰爲周公稱人之言也王肅云重
言天不可信明己之謂蓋畏其天命則肅意以周公
重言故稱又曰是又曰之義鄭王各異此篇又曰要
囚正義引顧氏云又曰者周公重言之則亦與王肅
同然古書竝無以又曰當重言者或引石鼓文凡疊
字作二爲證然疊字作二可也重言作又曰則使人
難曉古人必不如是苟簡也且尙書中孺子其朋孺
子其朋生則逸生則逸皆重言也竝無作又曰者王

肅之說不可從也鄭以又曰爲人又云是鄭讀又爲
有人又云者人有云也然則康誥兩又曰讀爲有曰
正合鄭義矣

于父不能字厥子乃疾厥子于弟弗念天顯乃弗克恭
厥兄

傳曰於爲人父不能字愛其子乃疾惡其子是不慈
於爲人弟不念天之明道乃不能恭事其兄是不恭
樾謹按儀禮士冠禮宐之于假鄭注曰于猶爲也聘
禮記賄在聘于賄注曰于讀曰爲蓋古于爲同聲故
得通用于父不能字厥子猶曰爲父不能字厥子也

于弟弗念天顯猶曰爲弟弗念天顯也枚不知于卽是爲而訓于爲於又增爲字以成其誼失之矣

作求

傳曰我是其惟殷先智王之德用安治民爲求等正義曰爲求而等之

樾謹按傳意蓋讀求爲述詩關雎傳曰述匹也故曰爲求等猶曰爲述匹也爾雅釋訓惟述鞠也釋文曰述本作求是求述通用之證正義曰求而等之未得傳意

朝夕曰祀茲酒惟天降命肇我民惟元祀

酒誥

傳曰朝夕勑之惟祭祀而用此酒不常飲惟天下教命始令我民知作酒者惟爲祭祀

樾謹按如枚傳之義則祀茲酒三字文不成義矣此祀字乃已之段借字周易損初九已事遄往釋文曰已虞作祀此段祀爲已之證已茲酒者止此酒也文王誥毖之詞至明切矣惟天降命卽承已茲酒而言謂止酒非一人之私言惟天降命也蓋重其事故託之天命耳肇我民惟元祀言與我民更始惟此元祀也元祀者文王之元年上文曰肇國在西土肇國者始建國之謂故知是文王元年也曰元祀者猶用殷

法也蓋文王元年卽有此命故云然耳上祀字段爲已下祀字乃本字古書一簡之中同字異義往往有之

亦罔非酒惟行

傳曰使民亂德亦無非以酒爲行者

樾謹按以酒爲行文義不明行當作衍字之誤也淮南子泰族篇不下廟堂而行四海今本行誤作衍是其例矣衍讀爲愆昭二十一年左傳豐愆釋文曰愆本或作衍是愆與衍古字通亦罔非酒惟愆正與下文亦罔非酒惟寧語意一律

越庶國飲惟祀德將無醉

傳曰於所治衆國飲酒惟當因祭祀以德自將無令至醉

樾謹按此祀字亦已之段字與上文祀茲酒同古已以通用此當讀越庶國飲爲句枚傳所謂於所治衆國飲酒也惟已德將無醉爲句已讀爲以枚傳所謂惟當以德自將無令至醉也因不知祀之爲段字而誤以本字說之遂於經旨大失矣

爾大克羞者惟君

傳曰女大能進老成人之道則爲君矣

樾謹按傳義非也此與上文奔走事厥考厥長義同
考卽老也君卽長也因考君連文則不辭故加惟字
以成句猶禹貢曰齒革羽毛惟木也下文曰又惟殷
之迪諸臣惟工與此正同臣惟工者臣與工也考惟
君者考與君也說文丑部羞進獻也爾大克羞考惟
君爾乃飲食醉飽言爾克進獻爾考與爾長爾乃亦
得以飲食醉飽也大乃語詞無實義朱氏彬經傳攷
證有釋大一篇詳言之

作稽中德

傳曰爲考中正之德

樾謹按稽字從禾說文禾部禾木之曲頭止不能上也故稽亦有止義說文稽部稽畱止也凡從稽之字如稭如稽俱有止義作稽中德者稽止也言爾克永觀省則所作所止無不中德也中讀如從谷中道之中枚傳以爲考中正之德失之

我西土斐徂邦君御事小子尙克用文王敎

傳曰我文王在西土輔訓往曰國君及治御事者下民子孫皆庶幾能用上敎

樾謹按輔訓往曰文不成義斐當讀爲非說見大誥篇天棐忱矣徂往也荀子解蔽篇不慕往楊注曰往

古昔也然則我西土葉徂者言我肇國西土至今未
遠非古昔也故邦君御事小子尙克用文王教也

不克畏死辜在商邑越殷國滅無懼

傳曰紂疾狠其心不能畏死言無忌憚紂聚罪人在
都邑而作之於殷國滅亡無憂懼

樾謹按白虎通京師篇引尙書曰在商邑卽此文也
則辜字當屬上讀不克畏死辜者言其不能畏死罪
也在商邑越殷國滅無懼者爾雅釋詁曰在察也越
與與同尙書連及之詞每用越字大誥王若曰大誥
猷爾多邦越爾御事又曰肆予肯我友邦君越尹氏

庶士御事皆其例也在商邑越殷國猶言在商邑與殷國商邑以紂所都言殷國蓋通指王畿千里之內紂察見商邑與殷國將滅亡而無憂此卽不克畏死辜之證也

弗惟德馨香祀登聞于天誕惟民怨

傳曰紂不念發聞其德使祀見享升聞于天大行淫虐惟爲民所怨咨

樾謹按登聞于天上箸祀字殊爲不辭攸義亦迂曲非經旨也祀乃已之段借字已以古通川說見上文此當於香字絕句猶曰弗惟德馨香以登聞于天也

又傳解弗惟爲不念蓋用爾雅釋詁惟思也之義然
不念德馨香亦爲不辭文選東京賦卜惟洛會薛綜
注曰惟有也是惟可訓有弗惟德馨香猶言弗有德
馨香也誕惟民怨猶言誕有民怨也蓋無德以聞于
天則所有者民之怨咨而已尙書中惟字可訓有者
甚多皋陶謨時乃功惟敘言有敘也大誥卜陳惟若
茲言有若茲也呂刑五過之疵惟官惟反惟內惟貨
惟來言有官有反有內有貨有來也惟之訓有蓋古
訓矣

王曰封

梓材

越謹按梓材一篇竝無誥康叔之文直以篇首一封
字故不得不屬之康叔耳嘗三復之而有疑焉康誥
之首有惟三月載生魄至乃洪大誥治四十八字此
文於全篇無涉蔡氏集傳因用蘇氏之說移此文於
洛誥之首然周公成勤乃洪大誥治與周公拜手稽
首曰朕復子明辟文不相屬且旣云周公成勤則篇
中當有慰勞五服之語洛誥豈有是耶然則此四十
八字在康誥在洛誥皆贅旒也竊疑當在梓材之首
王曰封者涉康誥酒誥之文而誤衍封字也王曰以
厥庶民暨厥臣達大家以厥臣達王惟邦君正合侯

句男邦采衛百工播民和見上于周之文蓋因五服
之臣民咸在進而諧之故以此發端也篇中文義雖
不盡可解然曰庶邦享作兄弟方來又曰庶邦丕享
又曰和懌先後迷民皆與篇首四十八字相應其曰
姦宄殺人宥又曰戕敗人宥蓋因四方民大和會而
播曠蕩之恩也若稽田若作室家若作梓材三喻皆
明營洛邑之不可已與大誥篇若考作室兩喻文義
相似皆諧衆之詞故多爲譬喻以明之因篇首衍封
字遂誤以爲諧康叔而篇中文義晦矣楊子法言問
神篇曰昔之說書者序以百而酒誥之篇俄空焉今

也夫酒誥見在而云俄空自來不得其說按楊子明
言昔之說書者序以百則所謂今亡者自是其序非
謂其書若以書而言則上文固云不備過半非止一
篇之空矣今書序云成王既伐管叔蔡叔以殷餘民
封康叔作康誥酒誥梓材楊子之意蓋以酒誥當自
有序不與康誥相屬故有俄空之歎其說必有所受
之也夫酒誥且不與康誥相屬則梓材更可知矣後
人見康誥酒誥梓材同屬一序因疑梓材首四十八
字總冒三篇不得專屬梓材乃移而置之康誥之首
又以三篇同序謂梓材亦是誥康叔者遂于篇首加

封字而其誤乃不可復正矣原其所以致誤之由蓋
始下今文家說尚書大傳載伯禽與康叔見周公三
見而三答乃見商子而問焉商子曰橋者父道也杼
者子道也此事亦見說苑建本篇論衡譴告篇蓋古
相傳有此事今文家見康誥酒誥之後有梓材之篇
遂據以爲說史公於衛世家亦有示可法則之文然
梓材篇豈有此義邪故知梓材一篇不屬康叔也
若作室家旣勤垣墉惟其塗暨茨若作梓材旣勤榱
桷惟其塗丹雘

傳曰如人爲室家已勤立垣墉惟其當塗暨茨蓋之

爲政之術如梓人治材爲器已勞力樸治斲削惟其
當塗以漆丹以朱而後成 正義曰二文皆言敷卽
古塗字明其終而塗飾之其室言塗墍墍亦塗也不
是以物塗之矣謂蓋覆也器言塗丹墍塗丹皆飾物
之名謂塗丹以朱墍墍是采色之名有青色者有朱
色者故鄭元引山海經云青丘之山多有青墍此經
知是朱者與丹連文故也

樾謹按傳義旣不分明正義以塗墍爲一事矣爲一
事塗丹墍共爲一事兩句不一律兩塗字又異義非
經旨也惟經文塗字據正義是敷字此則可據以訂

正者按漢書張衡傳惟盤逸之無教注曰教古度字
是教度通說文丹部腹下引周書惟其斂丹腹蓋壁
中古文段斂爲度孔安國因漢時教度通用故以教
字易之耳爾雅釋詁曰度謀也言旣勤垣墉則惟謀
墜茨之事旣勸樸斲則惟謀丹腹之事也說文土部
墜仰塗也艸部茨以茅葦蓋屋也是墜茨爲二事墜
者以上塗之茨者以草葢之也丹腹亦爲二事丹者
朱色腹者青色也正義旣引鄭注以腹爲青腹又因
與丹連文輒斷爲朱失之矣

庶邦享作兄弟方來

傳曰衆國朝享于王又親仁善鄰爲兄弟之國萬方皆來賓服

樾謹案枚以作兄弟爲句方來爲句甚爲不辭當以作兄弟方來五字爲句作者使也儀禮鄉飲酒禮作相爲司正鄉射禮作上耦射作衆賓射燕禮及大射儀小臣作下大夫聘禮及公會大夫禮則公作大夫鄭注竝曰作使也又周禮司士作六軍之士注曰作使之也是作有使義也方之言竝也說文方部方併船也方之本義爲兩船相併故卽訓併鄉射禮曰不方是注曰方猶併也聘禮注曰今文竝皆爲併是併

竝同字方訓併卽訓竝故微子篇小民方興宋世家
作竝興也作兄弟方來者使兄弟竝來也言使兄弟
之國竝來朝享也

羣經平議卷五